

1 Yohanis

Nai' Yohanis in surat ahunut

Nai' Yohanis antui nmatoom nok Yesus Kristus

¹ Au 'tui surat re' ia anmatoom nok Uisneno In *Kabin ma Prenat re' neiki 'monif*.

*Kabin ma Prenat re' neiki 'monif re' ia, anmui' nain na'ko oras pah-pinan ahun-hunut. Oras ia au, ma au partei ngguin amkius Goe ma miit Ee nok hai maاتم ein kiim. Hai mneen ma mitniin Ee nok hai ruikm ein kiim. Ma hai mre'o' Goe nok hai 'niim ein kiim. Hai mkius Goe on re' naan, ² natuin In nboor neem anbi hai sonam ma hai tnaanm ein. Unu' te, In natua nok In Amaf, mes oras ia In naruru' ma nakrira' In tuan ee neu kai. Nok ranan naan hai mibrain he mitoon meu ki on mee m'es mansian ii bisa napein monit re' namneo ma namnoon re' ka natfeek niit fa. Fin In re' naan, *Kabin ma Prenat re' neiki 'monif*.^{*}*

³ Hai he mitoon ki, are' saa' ii re' hai mkius ma hai mneen amrair sin, he hi bisa mneka' mees mok kai. Fin hit ok-oke' tmafutu' trair tok Uisneno ma In Anah re' In nreek Ee neem, es re' Yesus Kristus. ⁴ Onaim hai mtui surat re' ia, he mharineb hi neekm ein. Nok ranan naan, hai neekm ein anmarinan ntein' ein.

Apirsait ein ro he nmoni nbin me'u

⁵ Noni' re' Nai' Yesus natoon anrair sin neun kai, oras ia hai he mitoon sin meu ki, on nai: Uisneno naan, ro reok re'uf. In ka nmui' fa

^{*} **1:1** Nai' Yohanis 1:1 ^{*} **1:2** Nai' Yohanis 1:14

maufinu kre'o msa'. Fin In on re' me'u re' ntana', re' ka nmui' fa meis'okan a'kre'o msa'.
 6 Karu hit ta'uab am tak, "Hit tmoin nekaf mese' tok Uisneno," te kaah, hit fe'e tmoin tok 'moe' maufinu, naan on re' hit tmoni tbi meis'okan. Fin hit ta'uab puta-kriu goah, ma ka tmoin fa tatuin ranan amneot. 7 Mes karu hit tmoin tatuin ranan amneot, hit on re' tuaf re' nmoni nbi Uisneno In me'u. Nok ranan naan, hit bisa tmoin nekaf mese' es nok es. Ma hit neek ii njari kninu', natuin Uisneno In Anah Nai' Yesus anmaet, ma In naa' ee nnoes nain hit sanat ma penu sin ok-oke'.

Tuaf re' nmoni nbi me'u, ka nmoin fa nok 'moe' sanat antein

8 Karu hit ta'uab am tak, "Hit ka tmoe' fa sanat," naan anjair tanar am nak, hit tapoi hit tuak ii kuuk, ma ka tahiin fa saa' re' batuur. 9 Mes karu hit tmanaku' hit sanat, Uisneno re' neek amneot ma amnonot, of anmoe' natuin In rais manba'an ma nnoes nain hit sanat ma penu sin, ma nakninu' hit nekak. 10 Karu hit ta'uab am tak, "Hit ka tmoe' tiit fa sanat," naan hit tmoe' Uisneno njair aputa-kriut! Fin In na'uab anrari mnak, mansian ii ok-oke' nasaanb ein. Ma karu hit ta'uab on naan, ro batuur, In Kabin ma Prenat ka nmoin fa et hit nekak.

2

1 Anah amaneekt ein arki! Au 'tui utoon 'ain rasin re' ia ok-oke', maut he hi kais ammoin misanab amtein. Mes karu nmui' tuaf re' nasanab, anmui' tuaf re' of anpeis kit anbi Uisneno In human ma In matan. In re' naan, Yesus Kristus, es re' Tuaf Akninu' re' Uisneno nreek Ee neem neu pah-pinan ia. 2 In nmaet

ma njair fua'-turu' neu kit, he Uisneno nnoes nain hit sanat ma penu sin. Ka neu kit itmees jah fa, mes neu mansian ii ok-oke' nbi pah-pinan ia msa'.

Tuaf re' nmoni nbi me'u, nmoe' natuin Uisneno In aprenat, aneis-neis prenat anmatoom nok rais manekat

³ Hit tahiin tak, hit tahiin tarek-reko' Uisneno, karu hit tatuin In apreent ein. ⁴ Tuaf bisa na'uab ahaa mnak, "Au uhiin Uisneno" Mes karu in ka nmoe' natuin fa Uisneno In aprenat, in re' naan aputa-kriut re' na'uab ate, a'teta', anmo'e te, a'teta'. ⁵ Mes tuaf re' nmoe' natuin Uisneno In aprenat, naan anjair bukti mnak, in nmanekat neu Uisneno ro batuur. Nok ranan naan, hit tahiin tak, hit re' ia, Uisneno lin na. ⁶ Onaim karu tuaf na'uab am nak, "Au 'moni 'mafuut 'ok Uisneno" in ro he nmoin nahuum on re' Yesus Kristus.

⁷ Anah amaneekt ein arki! Prenat re' au 'tui je re' ia, ka rais fe'u fa neu ki. Fin aprenat re' ia matu'i ma ma'boto' nain anbi Uisneno In Kabin ma Prenat re' hi mneen ma mitniin main je na'ko unu'.^{*} ⁸ Maski on naan amsa', mes anmui' rais fe'u re' au he 'tui, nmatoom nok Nai' Yesus In aprenat. Prenat re' ia nanaob on nok reko nbi Nai' Yesus In a'monin. Ma prenat ia nmurai nanaob on anbi hi 'monim, natuin meis'okan re' et hi neekm ein anmurai namneuk, ma me'u re' batuur anmurai ntana' nbi hi 'moinm ein.

⁹ Atoni' bisa na'uab ahaa mnak, "Au 'moni 'bi me'u." Mes karu in neekn ee nameen anmatoom nok in aon-bian, naan anjair tanar

^{*} 2:7 Nai' Yohanis 13:34

am nak, in fe'e nmoni nbi meis'okan. ¹⁰ Fin atoni' re' nmoni nbi me'u, in ro he nneek in aon-bian, ma ka nmui' fa maufinu saa'-saa' anbi in nekan re' nmoe' je he nmouf.

¹¹ Es naan ate, karu nmui' tuaf re' in neekn ee nameen anmatoom nok in aon-bian, naan anjair tanar am nak, in anmoni nbi meis'okan. In nnao nabre-reo goah, natuin meis'ookn ii nafoorb ee.

Tuaf re' nmoni nbi me'u, ka nmoin natuin fa pah-piin ii in romin

¹² Ri'aan ein! Au 'tui surat re' ia 'eu ki, natuin Kristus anmaet neu ki, rarit Uisneno nnoes nain hi sanat ma penu sin.

¹³ Mahoint ein! Au 'tui surat re' ia 'eu ki, natuin hi mihiin Yesus Kristus, re' ahunut ma nbi nain naa na'ko un-unu'. Muinf ein! Au 'tui surat re' ia 'eu ki, natuin hi mmakeen amraban maufiun gui in tuan, tar antea hi miis.

¹⁴ Ri'aan ein! Au 'tui surat re' ia 'eu ki, natuin hi mihiin Aam Uisneno. Mahoint ein! Au 'tui surat re' ia 'eu ki, natuin hi mihiin Yesus Kristus, re' nbi nain naa na'ko un-unu'. Muinf ein! Au 'tui surat re' ia 'eu ki, natuin hi mitunu' Uisneno In Kabin ma Prenat anbi hi neekm ein, tar antea hi mi'bei', ma hi mmakeen amraban maufiun gui in tuan.

tar antea hi miis.

¹⁵ Hi kais amneek pah-piin ii in a'romin, ma pah-piin ii in baer' ein. Fin tuaf re' nneek pah-pinan, ka bisa nneek fa Aam Uisneno.

¹⁶ Rasi re' nbi pah-pinan ia ka nmaf uut fa nok Uisneno. On re' tuaf re' nmoin he nharineb in tuan aa kuun; aparu' ma akomat; ma abe'ot natuin in a'mu'in. Are' rasi on re' naan, ka na'uun ma na'ba'an fa nbin Aam Uisneno. Fin sin na'uun ma na'ba'an nbin pah-pinan ia goah. ¹⁷ Te kaah pah-pinan ia of namneuk, nabu-bua nok rasin re' atoni' nroim he naim sin. Mes tuaf re' nroim he nmoe' natuin Uisneno In romin, in ka namneuk fa, fin in nmoin nabar-baar.

Tuaf re' nmoni nbi me'u ro he npaant on he kais napein poi

¹⁸ Ri'aan ein! Neon amsoupt ein he neman anpaumaakn een. Hi mneen amrair mak, atoni' re' nraban Kristus of anboor. Te kaah, sin anbin nain naan. Fin anmui' nrair tuaf re' nraban Kristus anbi mee-mee. Naan anjair tanar am nak, neon amsoupt ein anpaumakan he neemn een.✧ ¹⁹ Araabn ein anboor neman na'kon hit itnanak ma hit soonk ii kuuk. Te kaah, sin re' naan, ka hit tuaf ein aa fa. Fin karu sin batuur-batuur hit na, ro batuur sin ka nnao nasaitan kit fa, mes sin ntahan piut nabu-buan nok kit. Mes sin anfeen annaon. Onaim batuur, sin re' naan ka hit tuaf ein aa fa.

²⁰ Mes hi ka on sin fa. Fin hi mtoup Uisneno In Tuaf Akninu' In Asmanan. Ma In nturun ma nbaab ki, he hi ok-oke' mihiin saa' re' batuur. ²¹ Hi mak au 'tui surat re' ia, natuin au 'ak hi ka mihiin fa saa' re' batuur? Kahaf! Fin hi mihini mrair! Hi mihini mrair mee es re' batuur, ma mee es re' puta-kriu.

✧ **2:18** 2 Tesalonika 2:1-12

22 Te kaah, anmui' aputa-kriut re' neu-mneem et pah-pinan ia. On mee he hit bisa tahiin sin? Sin re' naan, es re' atoni' re' na'uab am nak, Nai' Yesus naan ka Kristus fa. Tatuin sin ite, Nai' Yesus naan ka Tuaf Akninu' fa re' Uisneno nba'an nain Je he nreek Ee neem. Tuaf re' na'uab on naan, anraban Kristus, fin sin ntorak nain Aam Uisneno nok In Anah. 23 Tuaf re' ntorak Uisneno In Anah, sin ntorak In Aamf ee msa'. Mes karu atoni' nmanaku' Uisneno In Anah, sin njarin Uisneno In aanh ein amsa'.

24 Onaim hi ro he mnaa' miher-heer piut meu saa' re' hi mneen ma mitniin na'ko unu'. Nok ranan naan, hi bisa mmafuut piut mok Aam Uisneno ma In Anah. 25 Ma In kuun es re' anba'an kit im nak, hit of atmoin tabar-baar tok Ne.

26 Au 'tui surat re' ia he hi mihiin anmatoom nok tuaf re' he napoi ki. 27 Hi mtoupu mrair Uisneno In Asmaan Akninu', ma hi mmoni mmafuut mok Ne msa'. Onaim hi ka mperлуу fa tuaf bian he nanoni' ki ntein. Fin Uisneno In Asmaan ahaa kuun nanokab, natuin In bisa nanoni' are' kanan rasi re' batuur. In ka nputa-kriu fa, on re' aputa-kriut ein. Onaim amnaa' miher-heran saa' re' In nanoni' nrair sin, he hi bisa mmoin nekaf mese' piut mok Kristus.

28 On nai, ri'aan ein! Hi ro he mmoni mmafuut piut mok Kristus. Maut he oras In nkoen On nfain neem, hi kais mimtau ma kais mimaeb om amhake mbi In human ma In matan. 29 Natuin hi mihini mmak, In nmoe' piut saa' re' batuur, etun es hi bisa mihini msa' mak, mansian ii ok-oke' re' bisa nmoe' natuin saa' re' batuur, sin njarin Uisneno In aanh ein amsa'.

3

Tuaf re' njair Uisneno In aanh ein ro he nmonin nok batuur — Uisneno In aanh ein ka nmonin fa nok 'moe' sanat antein

¹ Hi mitenab miit Ama' abit sonaf neno tunan In manekan neu kit! Fin In manekan naan ma'tain re'uf, tar antea In nait kit atjair In aanh ein. Batuur on naan! Mes atoni' re' nmoin natuin pah-piin ii in romin, ka nahiin fa hit re' ia sekau, natuin sin ka nahiin fa Uisneno.☆

² Ri'aan amaneekt ein arki! Hit tjari trair Uisneno In aanh ein, mes ka mahini' fa fe' hit of atjair on mee ttein. Re' hit tahiin ji on nai: oras Kristus ankoen On anfain neem, hit tjair on re' In imsa', natuin hit tkius ma tiit Ee maat-maat. ³ Mansian ii ok-oke' re' anpa-pao Kristus In anneman naan, sin of nakninu' sin a'moink ein, he nmoni kninu' on re' Kristus. ⁴ Rais saant ein ok-oke' antanhai Uisneno In aprenat. Etun es mansian ii ok-oke' re' nmo'en sanat, antanhai nrair Uisneno In aprenat ma anraabn Ee. ⁵ Hi mihini mmak, Kristus anjair mansian he nnoes nain hit sanat ma penu sin. In bisa nmoe' on naan, natuin In kuun ka nmoe' niit fa sanat.☆ ⁶ Onaim tuaf re' nmoni nmafuut piut nok Ne, ka nmoin fa nok 'moe' sanat antein. Mes karu tuaf anmoin nok 'moe' sanat piut, in sairt ii nak, in ka nahiin ma nakeo fa Kristus, ma ka nmafuut nok Ne fa.

⁷ Ri'aan amaneekt ein arki! Kais saa' es napoi naan ki. Fin tuaf re' nmoin ma nmoe' natuin saa' re' batuur, in re' naan atoin neek

☆ **3:1** Nai' Yohanis 1:12 ☆ **3:5** Nai' Yohanis 1:29

amneot, on re' Kristus. ⁸ Mes tuaf re' nmoin nok 'moe' sanat, in na'uu ma na'baa' nbi niut reu'f ein sin a'nakat. Fin in es re' nmoe' maufinu piut-piut na'ko un-unu'. Etun Uisneno In Aanh ee neem he nareu' nitu naan in 'moe' maufinu.

⁹ Tuaf re' njari nrair Uisneno In anah ka nmoin fa nok 'moe' sanat antein, natuin Uisneno nmoin et in tuan. In ka bisa nmoe' fa sanat piut, natuin In na'uu ma na'baa' anbi Uisneno. ¹⁰ Nok ranan naan, hit bisa tahiin sekau es re' na'uu ma na'baa' anbi Uisneno, ma sekau es re' na'uu ma na'baa' anbi niut reu'f ein sin a'nakat. Fin tuaf re' ka nmoe' natuin fa saa' re' batuur, ma tuaf re' ka nneek nahiin fa In aon-bian, naan anjair tanar am nak, in ka na'uu ma na'baa' fa nbi Uisneno.

Uisneno In aanh ein ro he nmanekan es nok es

¹¹ Na'ko un-unu', hi mneen ma mitniin main beno re' nak, "Ammaneek es nok es!"[☆] ¹² Hi fe' mimnau nai' Kaen nok nai' Habel sin reta', ai'? Kais ammoe' mituin nai' Kaen, fin in na'uu ma na'baa' nbi maufun gui in tuan, tar antea in na'maet in orif nai' Habel. Nansaa' am es in nmoe' on naan? Naan, natuin in nmoe' rais maufun ein, mes in oirf ee nmoe' rais amneot ein.[☆]

¹³ Aok-bian arki! Kais amsanmaak karu atoni' re' natuin pah-piin ii in romin sin neek ein namenau neu ki. ¹⁴ Hit tahiin tak, karu tuaf re' nmo'e nsaan anmaet, in of mabetis na'ko Uisneno. Mes natuin hit atmaneek teu hit aok-bian sin, naan anjair bukti mnak, karu hit tmaet, hit of atmoin tabar-baar tok Uisneno.

[☆] **3:11** Nai' Yohanis 13:34 [☆] **3:12** Reta' Ahun-hunut 4:8

Karu ansuun tuaf re' ka nmui' fa rais manekat anmaet, sin of mabetis na'ko Uisneno. ¹⁵ Fin tuaf re' neekn ee nameen neu in aon-bian, in nahuum on re' na'maet tuaf. Hi mihini mrari mmak, atoni' humaf on re' naan ka napein fa 'monit abar-barat nok Uisneno. ¹⁶ Hit bisa tahiin rais manekat re' batuur ta'ko Kristus In a'tope'. Fin In es re' anneek kit tar antea In nnona' In tuan ee he nmaet, ansenu' ma nseka' kit. Es naan ate, hit ro he tnona' hit tuak ii teu hit aok-bian sin. ¹⁷ Karu nmui' tuaf re' in a'moin ii nanokab, rarit in nkius in aon-bian tuaf es, re' in a'moin ii ma'mu'it, mes in ka nkasian ee fa he nturun ma nbaab ee, on mee m'es in bisa na'uab am nak, "Au 'neek Uisneno!" Ka bisa fa, tua!

¹⁸ Ri'aan amaneekt ein arki! Kais suma mneek meik uab maneekt ahaa, mes hi ro he mmoe' rais reko msa', he miruru' ma mikrira' rais manekat re' batuur. ¹⁹ Fin karu hit taruru' ma takrira' rais manekat ma tmoe' rais reko on naan, hit bisa tahiin tak, hit tmoin tatuin rais amneot. Nok ranan naan, hit kais tamtau, ma hit bisa tait hit humak ma hit matak oras hit tbaiseun Uisneno. ²⁰ Maski hit neek ii kuuk fe' nakuu kit piut anmatoom nok rais re'uf re' hit tmoe' tiit ee, hit kais tamtau. Fin Uisneno In rais kasian ee, ko'u anneis na'ko hit rais kasian. Ma In nahiin sin ok-oke' msa'.

²¹ Ri'aan amaneekat arki! Karu hit neek ii ka nakuu kit fa, hit bisa tpirsai hit tuak ii ma kais tamaeb ok oras hit tbaiseun Uisneno.

²² Natuin hit tmoe' tatuin In apreent ein, ma tharineb In nekan, etun es hit bisa ttoup are' rasi re' hit ttoit sin ta'ko Ne. ²³ In apreent ee nak on nai: ampirsai piut meu In Anah Yesus

☆ **3:14** Nai' Yohanis 5:24

Kristus, re' In nreek Ee neem. Ma ammaneek piut es nok es, on re' Nai' Yesus naprenat anrair je. ✧ ²⁴ Tuaf re' nmoe' natuin Uisneno In apreent ein, in nmoni nmafuut nok Uisneno. Ma Uisneno nmafuut nok ne msa'. Hit tahiin tak, In nmoin et hit nekak, natuin In Asmaan ee anmoin et naan.

4

Uisneno In aanh ein ro he npaant ok he sin kais napenin rais poi

¹ Ri'aan amaneekt ein arki! Kais mitun-tuin ahaa, karu tuaf nak, in neik haan beno na'ko Uisneno. Mes hi ro miprikas mirek-reko' he mihiin karu in uab naan batuur-batuur neem na'ko Uisneno, ai' kaah. Fin oras ia nmui' aputa-kriut amfaun re' nnaon nfuun am nateef anbin pah-pinan ia. Sin napoin am nak, sin re' naan, Uisneno In mafefa kniun' ein. ² Hit bisa tahiin haan beno re' batuur-batuur neem na'ko Uisneno In Asmaan ee, on nai: Uisneno nba'an nain na'ko unu' he nreek neem In Anah neu pah-pinan ia. Karu tuaf re' neik haan beno naan anmanaku' mnak, Yesus Kristus naan batuur-batuur Uisneno In Anah re' njair mansian on re' hit, in haan beno naan, ro batuur neem na'ko Uisneno. ³ Mes tuaf re' ka nmanaku' fa Yesus Kristus on naan, in ka na'uu ma na'baa' fa et Uisneno. Fin rasi naan neem na'ko araban Kristus. Hi mneen ma mitniin miit am mak, re' anraban Kristus naan, of anpoi ma nboor neem. Te kaah, araban on re' naan anbi nain pah-pinan ia.

✧ **3:23** Nai' Yohanis 13:34, 15:12,17

⁴ Ri'aan amanekat arki! Hi re' naan, batur mi'uu ma mi'baa' mbi Uisneno, ma In kuasa et hi neekm ein. Etun es hi miis maan re' araban Uisneno. Fin In Asmanan re' et hi neekm ein naan, in ma'tanin, ma'tani' nneis na'ko kuasa re' et pah-pinan ia. ⁵ Sin re' naan, na'uun ma na'ba'an nbin pah-piin ii in amnekin. Etun es sin uabk ein na'uun ma na'ba'an amsa' nbin pah-pinan ia in romin. Rarit mansian pah-piin ii nromin he nneen ma natniin sin. ⁶ Mes hit ta'uu ma ta'baa' tbi Uisneno. Etun es tuaf re' nahiin Uisneno, in nroim he nneen ma natniin kit. Mes tuaf re' ka na'uu ma na'baa' fa nbi Uisneno, sin ka nromin fa he nneen ma natniin kit. Nok ranan naan, karu tuaf nak in neik haan beno na'ko Uisneno, hit bisa tahiin mee es re' batur, re' na'uu ma na'baa' nbi Uisneno In Asmanan, ma mee es re' puta-kriu.

Atmaneek ma tpirsai — Manekat naan, saa'?

⁷ Ri'aan amanekat arki! Hit ro he tma-neek es nok es, natuin rais manekat na'uu ma na'baa' nbi Uisneno. Ansuun tuaf re' anmaneek amsa', naan na'uu ma na'baa' nbi Uisneno, ma nahiin narek-reok' Ee. ⁸ Mes tuaf re' ka nmui' fa rais manekat, in ka nahiin fa Uisneno. Natuin Uisneno, In es re' manekat. ⁹ Uisneno naruru' ma nakrira' In manekan neu kit on nai: In nreek In Aan fua mese' neem neu pah-pinan ia, he nfei ranan neu kit. Nok ranan naan, hit bisa tmoin tabar-baar tok Uisneno. ¹⁰ Karu he mkius manekat re' batur, kais amkius hit manekat teu Uisneno. Mes amkius Uisneno In manekat neu kit, natuin In nreek In Anah he nmate njair fua'-turu' he nsenu' ma nseka' kit. Nok ranan naan, In nnoes nain hit

sanat ma penu sin, he hit bisa tmaram'e' tfain tok Ne.

¹¹ Ri'aan amanekat arki! Natuin Uisneno nneek kit ma'tani' on naan, hit ro he tmaneek es nok es amsa'. ¹² Ka nmui' fa tuaf mese' re' nkus niit Uisneno maat-maat. Maski on naan amsa', mes karu hit atmaneek es nok es, in sairt ii nak, Uisneno nabu-bua nok kit. Ma In manekan na'baab on piut anbi hit a'monik, tar antea njair manekat amneot ma amnonot.✧

¹³ Uisneno nfee nrair In Asmanan et hit nekak. Etun es hit tahiin tak, hit tmoin nekaf mese' tok Ne, ma In nekaf mese' nok kit imsa'. ¹⁴ Au, ma au partei ngguin amkius miit amrair Uisneno In Anah nok hai humam ma hai matam kiim. Rarit hai mitoon meu mansian ii ok-oke' mmak, Ama' Uisneno nreek neem In Anah, he nsoi nafetin mansian pah-pinan ia na'ko sin sanat ma penu sin kuasan. ¹⁵ Ansuun-suun tuaf re' anmanaku' mnak, Nai' Yesus naan, Uisneno In Anah, in nmoin reko nok Uisneno, ma Uisneno nmoin reko nok ne msa'. ¹⁶ Hit tahini mtak, Uisneno anneek niis kit. Etun es hit tpirsai mtak, In of anneek kit piut.

Uisneno nneek niis mansian. Onaim tuaf re' nmoin ma nmaneek es nok es, anmoin nekaf mese' msa' nok Uisneno, ma Uisneno nekaf mese' nok ne msa'. ¹⁷ Karu hit nekaf mese' tok Uisneno, hit rais manekat anjair batuur. Oras neon amsoupt ii ntea, Uisneno he nparikas ansuun-suun tuaf in a'moin naan, hit kais tamtau he thake tbi In human ma In matan, natuin hit tjair on re' Kristus oras In nmoni nbi pah-pinan ia fe'. ¹⁸ Karu hit tmoin

✧ 4:12 Nai' Yohanis 1:18

tbi manekat es nok es, hit ka tmui' fa rasi mtaus a'kre'o msa'. Fin karu hit atmaneek nok batuur, naan on re' hit tait itporin rasi mtaus ein ok-oke' nbi hit nekak. Karu tuaf namtau, in nekan naan ansuus, natuin in namtau neu he napein hukun. In on re' ri'ana' re' ka nahiin fa fe' rais manekat re' batuur.

¹⁹ Hit tmaneek es nok es, natuin Uisneno anneek nahunun kit. ²⁰ Karu tuaf na'uab am nak, "Au 'neek Uisneno," te kaah, in neekn ee nameen neu in aon-bian, naan in napoi. Fin karu tuaf ka nneek fa in aon-bian re' et in human ma matan, on mee m'es in bisa nneek Uisneno re' in ka nkus niit Ee fa fe'? Ka on naan fa, ai'? ²¹ Fin Uisneno kuun nasanut aprenat am nak, hit kais atneek aah Ee nmees, mes hit ro he tneek hit aok-bian atoin apirsait ein amsa'.

5

¹ Are' apirsait ein nak, Nai' Yesus naan batuur Kristus, re' Uisneno nreek Ee neem. Sin re' naan, anjarin Uisneno In aanh ein. Fin tuaf re' nneek tuaf es, re' njair amaf, in nneek amaf naan in aanh ee msa'. ² Karu hit tneek Uisneno, ma tmoe' tatuin In apreent ein, naan naruru' ma nakrira' mnak, hit tneek In aanh ein amsa'. ³ Onaim karu hit tneek Ee, hit tmoe' tatuin In apreent ein. Ma In apreent ein ka ma'fena' fa. ⁴ Hit re' atjari trair Uisneno In aanh ein, bisa tiis pah-piin ii in romin, natuin hit tpirsai Je. ⁵ Fin tuaf re' bisa niis naan pah-piin ii in romin, es re' tuaf re' anpirsai mnak, Nai' Yesus naan, Uisneno In Anah.

☆ 5:3 Nai' Yohanis 14:15

Atpirsai Nai' Yesus, in areokn ii saa'?

⁶ Asar hi mihini haa, Nai' Yesus naan, ka suma mansian biasa fa. Fin In re' naan Kristus amsa', re' Uisneno nreek anrair Je neem anbi pah-pinan ia. Oras In he nanaob In mepu, nai' Yohanis nasrain Je nok oe. Rarit In nmate msa', ma In naa' ee nat'oop ma nasai. Onaim re' pentiing ii, ka suma fa es re' oe re' nai' Yohanis anpaek je he nasrain Je, mes In naa' ee re' nat'oop ma nasai naan, pentiing amsa'. Fin Uisneno In Asmaan aa kuun es re' natoon on re' naan, ma In ka bisa nputakriu fa. ⁷ Anmui' rasi nono' teun re' njarin saksii.* ⁸ esan re': Uisneno In Asmanan, oe re' nai' Yohanis anpaek je he nasrain Nai' Yesus, ma Nai' Yesus In naa' ee kuun. Rais noon teun ein naan, naruru' ma nakrira' rasi mese' anmatoom nok Nai' Yesus. ⁹ Karu mansian es, es re' anjair saksii, hit biasa tpirsai je. Anneisneisi ntein karu Uisneno kuun es re' anjair saksii anmatoom nok In Aanh haa kuun. Te kaah, rais noon teun ein re' ia, re' Uisneno npaek sin he naruru' ma nakrira' bukti mnak, Nai' Yesus naan ka mansian biasa fa nmees, mes In, ro Kristus amsa'. ¹⁰ Tuaf re' anpirsai Uisneno In Anah naan, in sairt ii nak, tuaf naan antoupu nrair Uisneno In Kabin ma Prenat anmatoom nok In Anah naan. Mes tuaf re' ka

* **5:7** Anmui' Suur Akinu' bian antui nteni' mnak, ["(7b) nbi sonaf neno tunan, esan re' Ama', Kabin ma Prenat, ma Asmaan Akinu'. (8a) Mes teun ein naan, mese'. Ma nmui' rasi nono' teun re' anjarin saksii nbin pah-pinan,"]. Te kaah, uab ein ia ka nmui' fa et tuis uab Yunani ahuunt ein. Sin nboran anbin Suur Akinu' es-a'nua bian anmurai na'ko abat bo'es am haa (14).

npirsai fa Uisneno, in on re' tuaf re' na'uab am nak, "Uisneno naan, aputa-kriut!" Nok ranan naan, in ka ntoup fa Uisneno In Kabin ma Prenat anmatoom nok Uisneno In Aanh aan kuun. ¹¹ Uisneno In Kabin ma Prenat In aafn ii on nai: In nfee kit 'monit re' batuur re' ka natfeek niit fa. Ma hit tapein 'monit naan, natuin hit tpirsai In Anah.☆ ¹² Onaim tuaf re' nmafuit nok Uisneno In Anah, napeni 'monit abar-barat nok Ne. Mes tuaf re' ka nmafuit fa nok Uisneno In Anah, ka napein fa 'monit on naan.

Nansaa' am es nai' Yohanis antui surat re' ia?

¹³ Au 'tui rasin re' ia ok-oke' 'eu ki re' ampirsai Uisneno In Anah, he hi bisa mihiin batuur-batuur am mak, hi mipein 'monit abar-barat.

Nai' Yohanis antui ntein anmatoom nok rais onen

¹⁴ Karu hit t'onen teu Uisneno ma ttoit saa' ahaa re' natuin In romin, hit neek ii bisa na'kii' nak, In nneen saa' re' hit ttoit je naan. ¹⁵ Ma karu hit neek ii na'kii' on naan, hit tpirsai msa' tak, hit ttoup saa' re' hit ttoit je ta'ko Ne.

¹⁶ Karu ho mkius ho aom-bian anmo'e nsaan re' ka neik je fa nbi mates, reko nneis ho m'onen ma mtoit he Uisneno anturun ma nbaab ho aom-bian naan, he in napein fetin. Au sairt ii nbi re' ia, es re' anmui' sanat re' ka neik fa tuaf neu rasi 'maten. Ma nmui' sanat re' bisa neik tuaf nbi rasi 'maten. Mes au ka 'reun fa he m'onen karu nmui' sanat on naan. ¹⁷ Anbi Uisneno In human ma In matan, are'

☆ **5:11** Nai' Yohanis 3:36

rais re'uf re' hit tmoe' sin naan, ansaan oke'.
Mes ka saant ein ok-oke' fa re' neiki 'maten.

*Nai' Yohanis namnaub antein rasi re' penti-
ing*

¹⁸ Tuaf re' na'uu ma na'baa' nbi Uisneno ka
nmoin fa nbi 'moe' sanat antein, fin Uisneno In
Anah, anpaant ee. Ma maufiun gui in tuan ka
niis naan Ee fa goen.

¹⁹ Hit tahini mtak, hit re' ia ta'uu ma ta'baa'
atbi Uisneno. Mes hit tahini msa' tak, maufiun
gui in tuan anmui' kuasa he n'ator mansian ii
ok-oke' nbi pah-pinan ia.

²⁰ Hit tahini mtak, Uisneno In Aanh ee neem
anrair he nfee kit mahinif he tahiin rasin ia, he
hit bisa tahiin Uisneno re' batur. Oras ia hit
bisa tmoin tmarama' tok Ne, natuin hit tmoin
nekaf mese tok In Anah, Yesus Kristus. Fin In
re' naan, es re' Uisneno batur. Ma In es anfee
neu mansian ii 'monit abar-barat amsa'.

²¹ Ri'aan ein arki! Ampanat mirek-reko' hi
'moinm ein. Kais-kais anmui' asi'ut re' nsenu'
ma nseka' Uisneno na'ko hi neekm ein naan.

On re' naan tua.

Au nai' Yohanis kau, tua.

**Uisneno In Kabin ma Prenat: Rais
Manba'an Fe'u nok Reta' Ahun-hunut
Genesis and the New Testament in the Amarasi
language of Indonesia
Kejadian dan Perjanjian Baru dalam bahasa
Amarasi dari**

copyright © 1999-2014 Unit Bahasa dan Budaya, Kupang NTT,
Indonesia

Language: Amarasi

Translation by: Wycliffe Bible Translators

This translation is made available to you under the terms of the
Creative Commons Attribution-No Derivatives license 4.0.

You may share and redistribute this Bible translation or extracts from
it in any format, provided that:

You include the above copyright and source information.

You do not make any derivative works that change any of the actual
words or punctuation of the Scriptures.

Pictures included with Scriptures and other documents on this site
are licensed just for use with those Scriptures and documents. For
other uses, please contact the respective copyright owners.

2022-03-11

PDF generated using Haiola and XeLaTeX on 21 Sep 2022 from source
files dated 30 Nov 2021

60603d94-9a14-5831-a729-e3ba7b0ebc25